

Bakristu bavukanye, dusangije urgendo, kuri uyu munsi Mukuru w'Aberanda bose, umunsi utwibutsa natwe ico duhamagariwe kuba (**KUBA BERANDA**) ukatwibutsa kandi iyo tuva n'ijo tuja. Ubu naho Yezu akaba ahehejeje kutwibutsa ingingo ngenderwako zidufasha kubandanya Urugendo tutajuragirika. Izo ngingo zikaba zitandukanye n'izo ab'iy'isi bishimikiza.

UYezu ati : « Hahiriwe abari n'umutima ushima ubworo kuko Ubwani bw'ijuru ari ubwabo ». Ashatse kutwerekwa ko abantu atakindi bogomvye kwishimikiza mu buzima bwabo uretse Imana, bakumva kandi bakamenya ko Imana ariyo TUNGA ryabo. Bikira Mariya mu gisabisho ciwe c'ugukenguruka akatubwira ati : *aboro yabahagije ivyiza abakungu nabo abarungika zayoye*. Abantu batobato, abicisha bugufi nibo bashobora kwugururira Imana imitima yabo, nayo igaheza ikababera intabonwa. Turumvako abo boro ku mutima nibo kandi bafise wa Mutima woroshe umuhanuzi Isaya abitubwira, bagaheza bagaterwa impuhwe n'amabi n'ingorane abavukanyi bariko baracamwo, kuberako batahuye ko turi abavukanyi mu Mana. Uwakristu rero ntatekana mu gihe iruhande yiwe hakiriho imitima y'ukurokora no gusabira ahereye ku wiwe bwite. Bakarizwa n'ukubona, nkuko Francisco w'i Assize abivuga, **RUKUNDO** adakunzwe. Tugaheza tukavuga ko tutazoruhuka, abantu bose batarokotse, nkuko Tereza w'Umwana Yezu abitwibutsa.

Iyi si turiko yuzuye intambara n'imidugararo, abakristu duhamagariwe kuba abitonda, kugira ngo ahari umudurumbanyo tuhashire ugutekana, kanatsinda abarundi barayamaze ngo « *iyibize nabi uyima ifu* ». Uwumaze kugabana bwitonzi nawe araheza akama anyotewe ubutungane. Ubwo butungane nabwo n'uguhananira agateka ka zina kiremwa nk'uko Yezu yabigenjeje mugukungira abo batagira ikibarwanira. Akarorero, n'igihe bazaniye Yezu Umugore yari yafashwe asambana agaheza akababaza ati:” *Uwudasife igicumuro muri mwebwe, namubanza ibuye*” bagaca biyonjorora uhoreye kubasaza. Yezu yatunganirize abo bose barenganywa. Ubutungane bagahamagarira abantu kuba abanyakigongwe. Kudatunga urutoke abandi. Cane cane abo bamagara make, abo kumbure igicumuro cafutanije kikabambura ka gateka k'abana b'Imana bakaba abaja ba Sekibi. Mur'iyi nzira y'ubweranda rero, tugomba kubaho nk'abantu. Hariho abashaka kubaho nk'abamaze kurangiza urugendo. Tugomba rero kurazwa ishinga n'ibihanamiye abantu, canke cane abo baruhijwe. Tugomba kuba abantu babushitse, kuko n'oho n'inema y'Imana izoronka aho ishinga imizi, nayahandi tuzoba turiko twubakira ku musenyi, inzu nayo ntiheza ngo ikomere, irame. Yezu rero aradutumiriye kuba abantu buzuye, niho tuzobera n'abandi akarorero kabushitse. Aberanda turavye mu buzima bwabo dusanga bari abantu basanzwe, ariko bakagerageza kubaho nkuko Inkuru Nziza ibidutumirira. Kubaho turangwa n'Urukundo. Dusabe duciye kuri Bikira Mariya we karorero k'Ubweranda, atwigishe kwakira Jambo w'Imana mu buzima bwacu niho tuzoheza natwe tukamushikiriza bene wacu.

Tugire Kristu